



30. januar 2015

UPA 2015/43

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Inatsisartut aamma Inatsisartut allaffeqarfiani aningaasartuutit tamanit takuneqarsinnaangornissaat kiisalu kialluunniit paasiniaasinnaangornissaa anguniarlugu Inatsisartut Suleriaasiata allanngortinnissaanut Inatsisartut Siulittaasoqarfia saqqummiusseqqullugu peqquneqarnissaanik Inatsisartut aalajangiiffigisassaattut siunnersuut.

(Inatsisartunut ilaasortaq Randi Vestergaard Evaldsen, Demokraatit)

Tungavilersuut

Demokraatini tungaviusumik isumaqarpugut pisortat aningaasaataanik atuineq tamanit takuneqarsinnaasariaqartoq. Kialluunniit takusinnaasariaqarpaa Namminersorlutik Oqartussat kommunillu Inatsisartut (taamaasillutillu innuttaasut) akuersissutaannik aningaasanik qanoq aqutsinersut.

Isumaqaratta demokratiskiusumik ingerlatsivimmi inuiaqatigiinni innuttaasut tamanna pisinnaatitaaffigisariaqaraa. Aamma isumaqaratta taamatut isiornikkut aningaasanik akisussaassuseqartumik aqutsinissaq siuarsarneqarsinnaasoq.

Kommunini oqartussaaffiit eqqarsaatigalugit kiisalu Naalakkersuisut taakkulu ataaniittut allaffeqarfiisa pisortat aningaasaataanik atuinerisa ammasumik pinissaa qularnaarneqarnikuuvoq pisortat ingerlatsinerat pillugu paasitinneqarsinnaatitaanermut inatsimmi malittarisassat naapertorlugit allattugaatinik paasiniaasoqarsinnaatitaammat. (Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaat nr. 9, 13. juni 1994-imeersoq).

Taakkuli malittarisassat Inatsisartunut Inatsisartullu allaffeqarfianut atuutinngillat, naak pineqartoq pisortat aamma ingerlatsivigigaluaaraat.

Inatsisartut Siulittaasoqarfia allattugaatinik takujumalluni qinnuteqaatinut atatillugu aningaasartuutit ilanngussartaannik tunniussisinnaavoq inatsisunik tunngaveqanngikkaluarluni - tassa imaappoq, atuuttunik malittarisassaqaanngikkaluartoq Inatsisartut Siulittaasoqarfiata akuersinissaanut pisussaatisisunik. Demokratini nalunngilarput, Inatsisartut Siulittaasoqarfiat arlaleriarluni akuersisarsimasoq - tunngaviumillu Inatsisartut Siulittaasoqarfiat pisussaaffeqanngilaq Inatsisartuneersunik imaluunniit Inatsisartut allaffeqarfianeersunik aningaasartuutit ilanngussartaannik tunniussissalluni allattugaatinik takujumalluni qinnuteqartunut.

Demokratini isumaqarpugut tamanna tunngaviumik ajortoq. Kikkut tamarmik pisortat atuinerannut paasiniaasinnaatitaasariaqarput aamma Inatsisartut kiisalu Inatsisartut Allaffeqarfiata atorsimasaat pineqartillugit.

Taamaattumik Demokratini siunnersuutigaarput Inatsisartut Suleriaasiannut aalajangersakkamik ilanngussisoqassasoq, aalajangersarlugu aningaasartuutit suulluunniit Inatsisartunit Inatsisartulluunniit allaffeqarfianit aningaasartuutigineqartut kikkunnilluunniit saqqummiunneqarsinnaassasut aamma kinaluunniit paasiniaasinnaatitaassasoq. Aalajangersagaq assersuutigalugu suleriaatsip kapitel 15-nut ivertinneqarsinnaavoq, qulequtaqartumi "Aalajangersakkat allat".

Siunnersuutigineqartut aalajangersagaq taamaattoq pissutaalluni kikkut tamat (innuttaasut aamma tusagassiorfiit) Inatsisartut Inatsisartulluunniit allaffeqarfiata aningaasartuutigisimasaanik tamanik takujumallutik piumasaqarsinnaanngussagaluarput. Qaavaticullu aamma Siulittaasoqarfiup aalajangersagaq naammassisinnaanngussagaluarpa, Inatsisartullu aningaasartuutigisimasaanik tamanik ingerlaavartumik Inatsisartut nittartagaannut ivertissuisalerluni.

Qanorluunniit aalajangersagaq atorneqaraluarpat Inatsisartuni taamatullu allaffeqarfitsinni aningaasanik tunniunneqartunik aqutsinitta ammasuunissaa qularnaarneqassaaq.

Siunnersuut akuerineqassappat ersarilluinnartumik takutissavarput uangut aamma Inatsisartuni (soorunami!) tapersensoripput ammasuunissaq akisussaassusilimmillu pisortat aningaasaataannik atuerusuttugut.

Taamatut oqaaseqarlunga Siulittaasoqarfiup akissutissaata partiilu allat oqaasissaata tusarnissaannut qilanaarpunga.

Pisortanut aningaasaqarnikkut allaffissornikkullu kingunerisassai

Allaffimmi nukiit suleriaatsip allangortinnissaanut siunnersuusiornermut nutserinermullu immikkoortitassagut sulisup ataatsip qaammatini pingasuni sulineranut atatillugu aningaasartuutinit annertunerunaviangitsut.

Siulittaasoqarfiup Inatsisartut aningaasartuutigisimasaannik tamanik ingerlaavartumik Inatsisartut nittartagaannut ivertissuisalernissaanut aalajangersagassatut siunnersuut malissappagu, taava allaffimmiunik suliarinnittartussarsiortariaqassaaq. Siunnersuuteqartup naatsorsuutigaa, tamanna pisinnaassasoq sulisut amerlingikkaluarlugit imaluunniit missingersuutit qaffanngikkaluarlugit.

Siulittaasoqarfiup nalilissappagu taama isumaqarneq piviusorsiunngitsoq, siunnersuuteqartup Siulittaasoqarfik qinnuigissavaa siunnersuummut akissummini tamanna ilannguteqqullugu.

Aamma aningaasartuutitut ilanngussat nittartakkami tamanut takusassiarineqartassanngippata allaffiunik atorfinitsitsisoqartariaqassaaq allattugaatinik takujumallutik qinnuteqartut qinnuteqaataannik suliaqartartussanik. Siunnersuuteqartup naatsorsuutigaa, tamanna pisinnaassasoq sulisut amerlingikkaluarlugit imaluunniit missingersuutit qaffanngikkaluarlugit.

Siulittaasoqarfiup nalilissappagu taama isumaqarneq piviusorsiunngitsoq, siunnersuuteqartup Siulittaasoqarfik qinnuigissavaa siunnersuummut akissummini tamanna ilannguteqqullugu.

Tassunga atatillugu oqaatigineqassaaq, allattugaatinik takujumalluni qinnuteqaatit kinguneranik aningaasartuutitut ilanngussarpasuit pineqarpata soorlu aningaasartuutitut ilanngussat ukiunut arlalinnut tunngasut, taava allaffeqarfiup allattugaatinik takujumalluni qinnuteqartoq orniguteqqusinnaavaa ilanngussanik misissuiartoqqullugu, ilanngussanik toqqaqqullugu ilanngussanillu assiliartoqqullugu - aamma soorlu Naalakkersuisut allaffeqarfiini malittarisassat taakkunani atuuttut naapertorlugit taama iliortoqarsinnaasoq.

Inuussutissarsiornermut aningaasaqarnikkut allaffissornikkullu kingunerisassai

Soqanngilaq

Innuttaasunut aningaasaqarnikkut allaffissornikkullu kingunerisassai

Siunnersuut akuerineqassappat innuttaasut allattugaatinik paasiniaasinnaalissapput soorlu aningaasartuutitut, ataatsimiititaliat angalanerannut atatillugu atorneqarsimasunut. Tamanna ammanerusumik paasiuminarnerusumillu ingerlatsinermik pilerstisissaaq.